

Danas u Sudu BiH



Sa privođenja uhapšenih u akciji Zenit u prostorije SIPA

Počinje suđenje za šverc droge iz BiH u Austriju

U Sudu BiH za danas je zakazan početak suđenja braći Ismetu (1979) i Enesu (1985) Gutliću, Adnanu Sadibašiću (1986) iz Zenice, te Edini Šarić (1977) iz Gradačca, optuženim da su, kao organizovana kriminalna grupa, krijumčarili veću količinu marihuane iz BiH prema Austriji.

Drogu su, navodno, skrivali u automobilima, prebacivali iz BiH preko Hrvatske do austrijskog grada Linza, gdje su je predavali drugim osobama radi njenog daljeg rasturanja na ilegalnom narko-tržištu, te sticali imovinsku korist.

Podsjetimo, ova grupa je uhapšena u decembru 2013. u akciji kodnog naziva Zenit, koju su izveli pripadnici SIPA i MUP-a ZDK-a, kada su, zajedno sa optuženim privedeni i Jasmin Ibraković i Salko Bešo. Tada su pretreseni objekti na osam lokacija u općini Zenica, a pronađeno je oko 600 grama spida te smjesa za miksanje droge, manje

količine skanka, četiri precizne digitalne vage, dva pištolja sa šest okvirova, 91 metak, više mobilnih telefona i SIM kartica, te drugi predmeti koji mogu poslužiti kao dokaz u daljem postupku.

Inače, akcija Zenit bila je nastavak operativne akcije na suzbijanju međunarodne trgovine drogom, u okviru koje su policijski organi Hrvatske zaplijenili 3,2 kg spida i sedam kg smjese za miksanje droge, a koji su krijumčareni iz Holandije prema BiH, dok su nadležni organi Austrije zaplijenili oko 300 g skanka, koji je švercovan iz BiH u Austriju.

U pitanju je bila veća akcija u sklopu koje su praćene komunikacije u Austriji i Hrvatskoj.

Braća Gutlić su u Rasputočju imala prevozničku firmu "Enistrans", dok je Ibraković imao registrovan prevoznički obrt "Jasko", a njihove ture išle su upravo ka Hrvatskoj i Austriji. **L. S.**